

me beneficia extent, quis memorem & gratum esse me debere non fatebitur? Sed altera quoque huius libri vobis nuncupandi ratio, & priore quidem non minus iusta accedit, quod ex huius libri argumento, quanta Deus in vos ipsos beneficia contulerit, & quot quantisque malis vos eripuerit, dum & Papisimo, & varijs erroribus liberat, animaduertetis. Quanquam enim ea est diuina & Euangelica veritatis vis, ut hominibus ad eam attendentibus, omnes errorum nebulas, & turpissima haereseon mendacia luce sua discutiat, singulare tamen, & quodammodo peculiare videri potest hoc Dei erga vos munus quod mira felicitate & celeritate illud infelix lolium, quod bono verbi Dei semini Satan admiscere solet, penitus ex vestra ciuitate extirpatis. Magna quidem Pastorum vestrorum, in primis autem magni illius Caluini vigilantia id factum esse, nemo quantumuis inuidus diffiteri potest: sed tamen in eo non parua certe laus vestra est, quod sanis Pastorum vestrorum consilijs paruistis, neque aduersariorum iudicia veriti, neque potentissimorum regum inuidiam & minas pertimescentes. Itaque in ea, quam vobis Dominus verbo suo patefecit, veritate purissima constanter & intrepide permansistis. Neque non tamen in vestra hac ciuitate Satan sua,